

Co se fèjel a se declarèr ladins?

Doi conferenzenz stampa te Comun general de Fascia e te Region à spiegà co fèr con la declarazion de partegnuda e percheche l'é emportant.



La Procuradora Cristina Donei e l'responsabil de l'ofize anagrafe del Comun de Vich Franco Pellegrin a la conferenza stampa sul dombrament te C.G.F.



La dirigenta del Servije mendranzes Pat Marilena Defrancesco e l'assessor regionèl Luigi Chiocchetti a la conferenza stampa sul dombrament a Trent.

Sozieta - Te Comun general de Fascia con Cristina Donei e Cesare Bernard, te na letra envièda ai capifamilia de Fascia, e amò a Trent te Region con Luigi Chiocchetti e Marilena Defrancesco, endèna la Festa del Rengraziament con Antone Pollam e fora per la strèdes de Fascia coi placac de la reclam manèda fora da la UAL. L'apel ai sentadins de Fascia l'é dut un e l'é chel de se declarèr ladins al dombrament de la popolazion de chest an. L'envit l'é chel de esser n popul soul, n teritorie adum che se sente de partegnir a na mendranza no demò percheche se rejona ladin, ma percheche se vif te chesta val e se vif ogne dì da ladins. La motivazioni a fondament de chest envit da pèrt de duta l'aministrazions teritorieles les é n muie, ma chela che vegn fora l'é soraldut che l dombrament l'é na ocajon per ge "dèr forza" a noscia comunanza, che la desmostre de esser adum e forta, per nos enstesc dant da dut, ma ence ti confron de chi, desche i nonejes, che che segur no i mencià de tor sù chest apuntamento per se declarèr ladins e palesèr sia partegnuda a n pòpul con chel che, dal pont de veduda identitèr, no i à nia da spartir. Se se fossa bogn de arjonjer la perzentuèla de acà diesc egn, l'82,78%, fossa n segnèl dassen positif, ajache se desmostrassa che béleche duta la val la se sent ladina. L numer te chest cajo l'é dassen emportant percheche

demò se sion duc l segnèl l'é fort. Sibie la Procuradora Donei che l'assessor regionèl Chiocchetti i à sottrissà che se declarèr ladins l'é ence n doer che aon desche mendranza recognosciuda dal Statut de autonomia. Se declarèr ladins l'é n onor e n doer e cognon l fèr soraldut te chest moment storich olache noscia "spezifizità", à palesà Luigi Chiocchetti, "la é oget de ataches e la vegn metuda en discusion."

Ma co se fèjel a se declarèr ladins?

Te Provinzia de Trent l chestionèr l vegn manà per posta, enveze chiò da nos e ence ti comuns olache stès Cimbres e Mochegn, la chèrtes per l dombrament les vegnarà portèdes te ogne cèsa da n rilevador che se prejentà a cèsa con n cartelin de recognosciment. L'é i Comuns che se à tout sù la gestion del dombrament e donca te ogne Comun l'é stat nominà i rilevadores che jirà cèsa per cèsa col chestionèr. Apede a la pèrt su la familia e su la cèsa, te duta la Provinzia de Trent, donca tant chiò da nos che te la Val de Non, l'é enjontà i papieres con la letra del President Dellai e la domandes su la partegnuda a la mendranzes.

Dò aer consegnà i chestionères fora per la cèses, i rilevadores podarà ence dèr na man, se serf, per la compilazion. N'outa scric

ite, i formulères cognarà esser consegné ti ofizies de Comun olache se stès, ma se pel ence l fèr te internet, e chest sistem vegn conseq de per sparagnèr i cosc de "imputazion" di dac e aer na maor segurezza de drete letura de chel che vegn scrit.

L sentadin l'à l derit de la privacy de chel che l declarea, ma tel medemo temp l'à ence l doer de enformèr de sia condizion ai fins statistics, donca l Dombrament l'é n obligh e duc sion oblighé a l fèr. I ofizies de Comun tegn dut controlà: olache l'é stat consegnà l chestionèr e se l'é stat dat de retorn o manco, e se zachei cognessa se desmentier i rilevadores jirà a l tor.

Te la pèrt del chestionèr per la rilevazion de la mendranzes l compilador cogn scriver ite se l partegn al popol ladin, mochen o cimber, e dapò ge vegn ence domanà se l'enten l lengaz de mendranza, se se l lo rejona e coscita inant. A la pruma domana donca duc i sentadins di comuns recognosciui desche teritorie de la mendranzes linguistiche é envié a resoner positivamente, aldelà del nivel de cognoscenza linguistica che vegn valutèda a pèrt con de autra domanes che serf per verificà la situazion e la mesures de stravardament. Chest aboncont l'é n dat autertant emportant, che sarà oget de reflescion tel davegnir de la politiches de nosc raion, desche, sessaben, dut l dombrament. (vr)

Rei de la Dolomites

La comunanzes de Fascia, Fiem e Primier a confront te la rei trentina de la storia

A fondament de noscia autonomia l'é na storia veiora, rica de avenimenc, tradizions, regoles e usitèdes che noscia comunanzes se à dat tel cors di secoi, e che chesta comunanzes à sapù tegnir sù a despet de gregn mudamenc politics e sozièi. Da chest prinzip pea via la Procuradora del Comun General de Fascia Cristina Donei per spieghèr l significat de na rei che, su envit de la Provinzia Autonoma de Trent, lea adum la comunanzes de Fascia, Fiem e Primier te n baratament e confront sun desvalives aspec che les arvejina, o desferenzia, una da l'autra.

Tel chèder de chesta "Rei de la Dolomites", la istituzions de la trei comunanzes, dò n percors de confront, les à metù ensema n program che per 10 dis portarà dant i contribuc de chisc trei raions sun desvalives temes.

Se pea via en jebia ai 20 de otober a l'auditorium "Casa della Gioventù" de Pardac, olache da les 18.00 l president Lorenzo Dellai, la Procuradora del Comun General Cristina Donei e i presidenc de la doi Comunitàdes de val de Fiem e Primier, Raffaele Zancanella e Cristiano Trotter, e amò l diretor del Museo storich del Trentin

Giuseppe Ferrandi, i prejentarà la Rei de la Dolomites.

Dò sarà na degustazion de prodoc tipics di trei raions e da les 20.30 l'espètacol "Per ladin... semper più bel? Frammenti di ladinità" a cura de la compagnia Estroteatro.

L program jirà inant con momenc de confront e proiezion de filmac en lunsch ai 24 e en mèrtesc ai 25 de otober a Tonadico, en mercol ai 26 e en jebia ai 27 a Ciavaleis, en vender ai 28 e en sabeda ai 29 te Fascia a Sèn Jan. L program é da veder sul sit: www.museostorico.it sot "appuntamenti". (lg)

L Cianton de l'Istitut

Picola rubrica de informazion culturèla

A che svelup ge corone pa dò?


Te chest moment che la Dolomites é sot l'eie di osservadores de l'Unesco, l'é segur de ütöl fèr na riflescion su la costions leèdes al svelup di raions da mont. N bel contribut, con l'analisa de la gestion de l'ambient te Fascia da pèrt de l'industria del turism, l'é l studie portà inant da la joena scritora Astrid Mazzola, tolan desche pruma fontèna de documentazion i articoi publiché ti egn su La Usc di Ladins. Chest studie é stat publicà da la Edizioni U.C.T. de Trent te n liber dal titol "A che svelup ge corone pa dò? Conformismo e dissenso riguardo allo sviluppo turistico", che vegn prejentà en vender ai 21 de otober da les 17.00 tel Museo Ladin de Fascia. A la prejentazion tolarà pèrt l'autora e l cognosciù hotelier e ambientalist badiot Michil Costa. Duc é envié a tor pèrt.

L Molin e la Sia a TML

Ve fazon ence a saer che la setemèna che vegn te "L Cianton de l'Istitut" sun TML vegnarà moscià l filmat su "L Molin e la Sia", doi sezions del Museo Ladin de Fascia, che fin dal scomenz l'é stat pissà desche "museo sul teritorie", no conzentrà te n post demò, ma articolà te na senta zentrèla e sezions periferiches te

desvalives païes de la val. "L Molin de Pèzol" a Pera e "La Sia" a Penia, realisé ite per i egn '80, à ciapà na neva viesta che se pel veder tel filmat ensema al lurier del moliné e l segat, feures de gran emportanza per l'economia e la vita da chi egn.

Chisc i oraries (orientatives) de "L cianton de l'Istitut" su TML: de lunsch da les 15.45; de mèrtesc da les 18.15; de mèrcol da les 22.00; de jebia da les 20.15; de vender da les 11.30; de sabeda da les 18.15; de domenica da les 21.00



La soracuerta del liber che vegn prejentà ai 21 de otober tel Museo Ladin.

A confront energies e teritorie

Transdolomites endreza n convegna a Poza ai 21 de otober per rejonèr de efizienza energetica e trasporc sosteniboi

Energia e ambient - La sociazions YoProduction e Transdolomites se à metù adum chest an per la prejentazion de "MetroNoce" e "Ferata de la Veisc", idees projetuèles che deide a ressolver i problemes de mobilità leé ai desvalives aspec de nosc viver da ogne dì. La doi sociazions à decidù de jir dò la strèda de la comunicazion e favorir l confront e dai 22 ai 24 de setember les à tout pèrt a "Klimamobility" la pruma fiera dedichèda a la mobilità sostenibola, nasciuda delaite de l'idea sudtirolera de "Klimahouse" e "Klimaenergy". L'enteress per l'argument é ruà ence a Cesare Bazzanella, responsàbol organisatif de la 19^ fiera de l'auto de Trent "Motorissima", che à envià la doi sociazions a tor pèrt a l'edizion 2011 ai 8 e 9 de otober a Trent, olache se à podù cognoscer la idees projetuèles e l materièl regoet ti desvalives vijes studie te la Èlpes. Amò apede YoProduction e Transdolomites se dèsc jù en colaborazion con Italia Nostra te l'organizacion del "Convegna internazionèl su la mobilità sun scines" che sarà a Trent ai 11 e 12 de november e i é che i valutea la prejenza a la Fiera "Fà la cosa giusta" di 27 e 28 de otober.

"Te pech più che n meis de promozion - scrif la doi sociazions - se pel jà veder l gran enteress de sogec che vegn da ambienc deldut

desferenc, desche chi de l'ambientalism e di motores: n segnèl emportant che moscia la condijion e la forza che pel ciapèr i temes de la sostenibilità canche i porta a projec concrec. N auter apuntamento de valuta più vejìn tel temp l'é chel che Transdolomites endreza a Poza en vender ai 21 de otober da les 20.30 te sala de consei de Comun. Sul tem "Efizienza energetica e teritorie" se confrontarà Ivan Fontana de l'Azienda Consorzièla di Servijes Municipalisè de Primier, Dino Detomas diretor del Consorzie Eletrich de Poza, Francesco Fellin del zenter CNR-EURATOM de Pèdua, Tullio Dellagiacoma ombolt de Poza, Silvia Silvestri de la Fondazione Mach de Sèn Micel e Riccardo Zulian de la sociazion Tzela. Vegnarà rejonà de energia renovabola, idroelettrich, comportament sosteniboi a cèsa noscia, sostenibilità energetica e ressanament di frabicac publics, de oportunitèdes concretes per l setor di trasporc e de davegnir energetich.



L logo de la Transdolomites.